

**Naalakkersuisooqatigiit isumaqatigiissutaat naapertorlugu Kujataani Itilliaruup N60.614 W45.46.622 ikerasaliorneqarnissaanik Naalakkersuisut suliniuteqarnissaanik peqquneqassasut Inatsisartut aalajangiiffissaattut siunnersuut.**

(Inatsisartuni ilaasortaq Kelly Berthelsen, Inuit Ataqatigiit)

**Akissuteqaat**

(Kommuninut, Nunaqarfinnut, Isorliunerusunut, Attaveqaqatigiinnermut Ineqarnermullu Naalakkersuisoq)

**Aappassaaneerneqarnera**

Naalakkersuisut sinnerlugit Sanaartornermut Ataatsimiititaliaq isumaqatigiissoq siunnersuutip suliarineqarneranut atatillugu sulilluarsimaneranut qutsavigaara.

Naalakkersuisut nuannaarutigeqisaminnik maluginiarpaat, ataatsimiititaliap isumaqatigiissup nuna tamakkerlugu sumiiffinnik ikerasaliorfusinnaasunik, imaatigut angallannermi isumannaassutsimut nukittorsaaviusinnasunik amerlanerusunik misissuisoqarnissaanut Naalakkersuisut allanguutissatut siunnersuutaata suliap ingerlaqqinneranut ilanngunneqarnissaa inassutigigaa.

Siunissami ikerasaliassanik tulleriiarisarnerit aningaasaliisarnerillu misissuiffigineqartarneranni kommunit qanittumik suleqatigineqartarnissaat oqaloqatigineqartarnissaallu Naalakkersuisut iluarisimaarpaat.

Nuna tamakkerlugu imaatigut angallannermi isumannaassutsimik pitsannguinnisaaq aammalu nunap tamarmiusup pitsaanerusumik ataqatigiilernissaa Naalakkersuisut pingaartittorujussuaat. Imaatigut angallanneq pitsanngorsarniarlugu suliaqarneq arlalitsigut salliutinneqarpoq. Assersuutigalugu AjunngiLars-imik atserlugu paasititsiniaaneq ingerlalluartorujussuuvoq inuit akunnerminni tusagassiuutitigut attaveqaqatigiinnerminni amerlasuunit malinnaavigineqarluni, soorlu piffissap ingerlanerani ikerasannortussat pillugit pilersaarummik ataatsimoortumik sananermi Nunatsinni imaatigut angallanneq sulii isumannaallisinneqarnerunissaa qulakkeerneqarsinnaasoq.

Tamatumanili avatangiisit akigineqassanngillat. Taamaattumik misissuinerni aamma pinngortitamut avatangiisinullu kingunerisassat misissuiffigineqartariaqarnerinut ataatsimiititaliap oqaaseqaataa Naalakkersuisut taperserpaat.

Isumaliutissiissummi paasinnineq saqqummiunneqartoq tunngavigalugu siunnersuutip akuerineqarnissaa Naalakkersuisut inassutigaa.